

BARAZA LA WAWAKILISHI ZANZIBAR

Simu Nam. + 255 24 2230602/1

Fax Nam. + 255 24 2230215

Tovuti: www.zanzibarassembly.go.tz



SANDUKU LA BARUA 902,
ZANZIBAR

Barua Pepe: zahore@zanlink.com

HOTUBA YA MAONI YA KAMATI YA SHERIA, UTAWALA BORA NA IDARA MAALUM KUHUSU UTEKELEZAJI WA MAAGIZO YA KAMATI KATIKA RIPOTI YA MWAKA WA FEDHA 2016/2017 KWA WIZARA YA NCHI OFISI YA RAIS, TAWALA ZA MIKOA, SERIKALI ZA MITAA NA IDARA MAALUM ZA SMZ

Mheshimiwa Spika, awali ya yote nianze kwa kumshukuru Mwenyezi Mungu Mwingi wa Rehema Mwenye kurehemu kwa kutujaalia uhai na uzima, ambavyo vimetuwezesha kukutana tena katika Baraza hili tukufu kwa kutekeleza majukumu yetu ya msingi kwa nchi yetu kiujumla. Ninamuomba Mwenyezi Mungu Mtukufu azidi kutubariki neema zake ambazo kwa hakika sote ni wahitaji kwake.

Mheshimiwa Spika, napenda pia kukushukuru na kukupongeza wewe pamoja na wasaidizi wako, Mhe. Naibu Spika pamoja na Wenyeviti wa Baraza kwa namna mnavyoliendesha Baraza kwa umahiri mkubwa, namuomba Mwenyezi Mungu awazidishie hekma na busara katika jukumu lenu la kutuongoza ili tuweze kutekeleza vyema wajibu wetu katika chombo hiki muhimu kwa nchi yetu.

Vile vile, shukrani za pekee ziende kwa uongozi mzima wa Wizara ya Nchi OR - Tawala za Mikoa, Serikali za Mitaa na Idara Maalum za SMZ kwa ushirikiano wao mkubwa wanaotunesha katika kufanikisha jukumu zito la utekelezaji wa mipango ya Serikali kwa ujumla la kuwapatia huduma bora na salama wananchi wake. Aidha, naomba kuchukua nafasi hii kumpongeza Mkuu mpya wa Wilaya ya Magharibi "A" Kapteni Khatib Khamis Mwadini ni matarajio yangu kwamba atafanya kazi kwa weledi na uwaminifu ili kuwaletea maendeleo wananchi wa Wilaya hiyo.

Mheshimiwa Spika, naomba kuchukua fursa hii kuwashukuru sana Wajumbe wa Kamati yetu ya Sheria, Utawala Bora na Idara Maalum kwa namna wanavyonipatia mashirikiano makubwa katika kutekeleza majukumu ya Kamati hii, ni dhahiri kwamba ushiriki wao ndio mafanikio ya Kamati yetu.

Mheshimiwa Spika, kwa ruhusa yako naomba sasa kuwatambua Wajumbe wanaounda Kamati hii kama ifuatavyo:-

1.	Mhe. Machano Othman Said	Mwenyekiti
2.	Mhe. Mwantatu Mbaraka Khamis	Makamu Mwenyekiti
3.	Mhe. Nadir Abdul – latif Yussuf	Mjumbe
4.	Mhe. Wanu Hafidh Ameir	Mjumbe
5.	Mhe. Saada Ramadhan Mwendwa	Mjumbe
6.	Mhe. Ali Khamis Bakari	Mjumbe
7.	Mhe. Suleiman Makame Ali	Mjumbe
8.	Nd. Ali Alawy Ali	Katibu
9.	Nd. Haji Jecha Salum	Katibu

Mheshimiwa Spika, kwa mujibu wa kanuni ya *108(14)* ya Kanuni za Baraza la Wawakilishi Zanzibar, imetoa fursa ya lazima kwa kila Kamati kutayarisha ripoti ya mwaka itakayowasilishwa katika kikao cha mwezi wa Februari cha Baraza la Wawakilishi Zanzibar kila mwaka.

Mheshimiwa Spika, aidha, kanuni ya *108(15)* ya Kanuni za Baraza, inaelezea kuwa kabla ya kuwasilishwa Barazani utekelezaji wa maagizo hayo, Kamati inatakiwa kukaa na wizara husika kujadili utekelezaji huo.

Mheshimiwa Spika, Kamati kwa kutumia Kanuni ya 106(3) inapewa jukumu la kufuatilia utekelezaji wa maagizo ya Kamati yaliyotolewa katika Ripoti ya Kamati ya mwaka uliotangulia. Ambapo kazi hii ilifanywa vyema kwa kipindi hiki kilichopita na bado Kamati inazidi kufuatilia utekelezaji wa maagizo hayo kila inapona inafaa kufanya.

Mheshimiwa Spika, kwa upande wa Wizara ya Nchi Ofisi ya Rais, Tawala za Mikoa, Serikali za Mitaa na Idara Maalum za SMZ, jumla ya maoni na ushauri 95 yalitolewa katika Idara mbali mbali. Ambapo zaidi ya asilimia 75 ya maagizo hayo yalikuwa katika Mamlaka za Mikoa.

Aidha, Kamati imepitia, imejadili na kujiridhisha na utekelezaji wa maagizo hayo kwa kipindi hiki ambacho Maagizo yaliyotolewa yanafanyiwa kazi. Kamati inamuomba Mwenyezi Mungu azidi kuwapa nguvu, imani na busara katika kukamilisha majukumu yanayowakabili. Hata hivyo, baadhi ya maagizo au ushauri kwa Wizara hii Kamati imekubaliana na Wizara kuyaandika upya na kuyaweka kiujumla kwa vile yanajirejea rejea kwa Taasisi nyingi za Wizara hii.

UTEKELEZAJI WA MAAGIZO:

Mheshimiwa Spika, Kamati imeitaka Wizara kufuatilia zaidi utekelezaji wa maagizo kwa kutoa maelekezo yafuatayo:-

- (i) Kamati inashauri Ofisi ya Mrajis wa Vizazi na Vifo kutoa elimu kwa wananchi kuhusu umuhimu wa kujisajili katika vyeti vya kuzaliwa, vifo, ndoa na talaka.

Mheshimiwa Spika; Kamati imeelezwa juu ya jitihada nyingi zinazochukuliwa kwa kutolewa elimu kwa wananchi kupitia vyombo mbali mbali vya habari kwenda kujisajili katika vyeti lakini changamoto kubwa iliyopo ni uhaba wa vitendea kazi kama vile magamba ya vyeti na mabuku ya fomu za B1 katika vituo vya kusajili vyeti.

Mheshimiwa Spika; Kamati inazidi kusesitiza juu ya kuchukuliwa hatua za kupatiwa vitendea kazi katika Ofisi za usajili wa vizazi na vifo kwa kupatiwa kwa wakati na hususan katika Wilaya za Unguja na Pemba. Vile vile, Kamati inaishauri Ofisi ya Mrajis wa Vizazi na Vifo kuweka bei elekezi kwa vyeti vya Ndoa itakayotumika maeneo yote ya Unguja na Pemba.

- (ii) Aidha, Kamati inashauri Serikali kuharakisha ujenzi wa kituo cha Daladala cha Kijangwani. Vile vile, Kamati haijaridhika kuwepo kwa kituo cha Daladala mbele ya ofisi kuu ya CCM Kisiwandui mpaka Tobo la pili Michenzani, hivyo Kamati inashauri kuondolewa kwa kituo hicho.

Mheshimiwa Spika; Kamati inafuatilia kwa umakini utekelezaji wa ushauri huu na inapongeza juhudi za wizara kwa kushirikiana na uongozi wa Mkoa wa Mjini

Magharibi kwa kuendelea kuratibu vyema suala hili la upatikanaji wa sehemu ya maegesho ya magari ya kisasa katika mji wetu wa Zanzibar ambao ndio kivutio kikubwa cha Utalii na chanzo cha uchumi wa nchi yetu.

- (iii) Kutokana na athari za matukio ya kesi za udhalilishaji na ubakaji, Kamati inashauri Serikali na Taasisi zinazohusika kusimamia Sheria na kuchukua hatua kali katika kudhibiti tatizo hili, ili iwe funzo kwa watendaji na wahalifu wengine wenye kufanya vitendo kama hivi.

Mheshimiwa Spika, kamati yetu imeelezwa kwa kina juu ya juhudi zinazochukuliwa na Serikali dhidi ya kukomesha vitendo vya udhalilishaji ikiwa ni pamoja na kuanzishwa kwa **Mpango wa Taifa wa Kumaliza Udhalilishaji wa Wanawake na Watoto 2017-2022.** Hivyo, Kamati inapongeza juhudi hizi na inaitaka wizara kusimamia kikamilifu Mpango huu ili kufikia malengo yaliyokusudiwa.

- (iv) Vile vile, Kamati inashauri kwa wakuu wa Mabaraza Pemba kuajiri kwa muda wataalamu kwa mikataba kwa mujibu wa mahitaji yao yalivyo kama wanavyofanya Unguja.

Mheshimiwa Spika, Katika utekelezaji wa ushauri huu Kamati imeelezwa kuwa ushauri huu unatekelezwa kwa kuwa Sheria na taratibu zinaruhusu Mamlaka za Serikali za Mitaa kuajiri wataalamu kwa mikataba.

Mheshimiwa Spika, Kamati inazidi kusesitiza kuwa katika ukusanyaji wa mapato katika Mabaraza haya na Halmshauri zake kuanzisha mfumo maalum wa ukusanyaji kodi kwa njia ya Kielektroniki ili kuziba mianya ya upotevu wa fedha.

Aidha, Kamati imeelezwa kuwa kila Halmshauri imeandaliwa fungu maalum ili kuhakikisha wamemudu kukusanya kodi kitaalamu.

Mheshimiwa Spika, Kamati inazidi kusesitiza fedha za miradi ya maendeleo na zile za mfuko wa Jimbo zitumike vizuri na kukamilisha malengo yaliyokusudiwa kwa kushirikiana na Halmshauri na Mabaraza ya Miji.

Vile vile, katika kufanikisha hili ni vyema fedha za Mfuko wa Jimbo zisitolewe Mwakilishi ambaye hakufanya marejesho na matumizi mazuri ya mwaka uliopita.

Mheshimiwa Spika, Kamati inatoa pongezi kwa utekelezaji mzuri wa ushauri uliotolewa kuhusu Askari jamii wa Mji Mkongwe na kufanyiwa kazi, Kamati imeelezwa kwamba askari Jamii wa Mji Mkongwe Mkataba wao walioingia na Manispaa ya Mjini hautaendelea tena kufikia mwishoni mwa mwezi wa Septemba 2017 baada ya malalamiko mengi kutoka kwa wananchi.

- (v) Kamati inashauri Serikali kuandaa Bima ya Afya kwa wafanyakazi wote wa Idara Maalum ili kuwajengea mazingira mazuri ya utendaji wao. Aidha, Kamati inaitaka Serikali kuanzisha Mfuko wa Hifadhi ya Jamii kwa upande wa Idara Maalum za SMZ kwa kuangalia utaratibu wa vikosi vya Jamhuri ya Muungano wa Tanzania.

Mheshimiwa Spika, kamati kupitia wizara hii, imeridhika na maelezo yaliyotolewa ya utekelezaji wa ushauri huu kwa kutambua umuhimu wa Bima ya Afya kwa watumishi wake. Kamati imeelezwa kuwa Serikali tayari imeanzisha mchakato wa kuanzisha Bima ya Afya kwa watumishi wote wa Umma, wakiwemo Watumishi wa Idara Maalum za SMZ kupitia wizara ya Afya.

Pia, Kamati imeelezwa kuwa Wizara kupitia Mfuko wa Hifadhi ya Jamii kwa kushirikiana na Idara Maalum za SMZ zimeunda Kamati Maalum ili kutafuta uwezekano wa kuziunganisha Idara Maalum na ZSSF.

Mheshimiwa Spika, Kamati inashauri Wizara kuzidi kusimamia maeneo yake ya Kambi zote za Idara Maalum kwa kuyapatia maeneo hayo Hatimiliki kwa kushirikiana na Idara ya Upimaji kwa zile Kambi ambazo hazijapatiwa na zimekuwa na migogoro ya hapa na pale pamoja na kuvamiwa ni wananchi.

HITIMISHO:

Mheshimiwa Spika, kiujumla Kamati ya Sheria, Utawala Bora na Idara Maalum imeridhika na utekelezaji wa maagizo iliyoyatoa katika Ripoti iliyopita lakini bado

changamoto kubwa ipo kwa makazi ya askari wetu wa Idara Maalum za SMZ kwani vituo vingi hali zao haziridhishi. Ni imani ya Kamati yetu kuwa kupiktia utekelezaji wa Bajeti hii na Ilani bora ya Chama cha Mpinduzi, changamoto hii itapatiwa ufumbuzi kwa muda mfupi ili nao kuweza kutekeleza majukumu yao kiufanisi zaidi.

Mheshimiwa Spika, Naomba kuwasilisha.

Ahsante,

.....

(Machano Othman Said),
Mwenyekiti,
Kamati ya Sheria, Utawala Bora na Idara Maalum,
Baraza la Wawakilishi,
Zanzibar